

12^r

Wye loblich vnd
vorfichtig allerdurchleu-
chtigster großmechtigster
konig/ Auch mit was tu-
gent vnnd gütten anfhlegen in an-
fangk das Rômifch reich vō gerin-
gen vrfprüngen in groffe macht vñ
wefen kūmen/ Durch wōlich vrfach
das gewachfen/ vnd wyderumb zū
mehr malen in abnemen gefallē fey
Würt von de⁹ aller redfprechftē Tito
Liuio in feiner Rômifchen Hiftoriē
(die er befchribē hatt)an gezeygt/ die
billich alleregirer(als einē fpigel vñ
exempel)anfehen/ darinñ alles was
zū merung des reichs nutz vñ dinf-

12^v

lich fein/ Was auchdaffelbig in abfall bracht vñ teglich bringē mag erfundē wirt
 dañ keiner vnder allen den die Hiftorien befchreiben/ das Römifchreich alfo herlich
 vñ brechtlich(wie Liuius gezireth hat)der auch bey feinem lebē/ nicht weniger lobs
 in den Römifchen gefchichten zů befchreiben/ dañ die ftadt Rom in vberwindung
 der feinde vnd jren triumphē hat erlangeth/ Auch fanct Hieronimus in der vorredt
 der Bibliē antzeige gibet/ do er fagt/Wie erliche edele heren von Franckrecch vñ Hy-
 ſpanien zů Tero Liuiio/ als zů eynem bach oder fließ der von Suffen vnd lyblichē
 reden(als mit milch flüffe)kommen fein/ vnd die jhenen/ die dye ftadt Rom in allē
 jrem wesen vnd vermogen/ nicht bewegē mogt/ do hyn zůkommen/ vnnd fie zů be-
 fichtigen/ hat das gerucht vnnd lobe diß es eynigen Titi Liuij do hyn bracht/ das
 fie inen allein fehen vnnd hören wolten/ Dañ Liuius vor allen andern(die von der
 Rōmer vnd ander nation gefchichten vnnd kriegem gefchriben haben/ den furzoge
 (vnnd als Hercules)vnder allen ftarcken vnd platz beheldeth/ Als der jhene der im
 lefen nicht verdrossen/ funder lieblich vnd frolich/ Auch im außſprechē dapffer vñ
 großmütig wirdt erfundē/ keyner ift vnder allen den jhenē/ die Hiftoriē ye befchrie-
 ben haben/ der die oren der menfchen mit feinen reden vnd oration(die allenthalben
 in difem büch ein geflochten fein)volkūlicher mogeerfullen keiner/ der das hertz vñ
 gemüdt der menfchē/ mer durchdringen vnd leichtlicher zů frewde zorn vñ mit leydē
 bewegen mage/ dañ Linius/ Deßhalben er woll billich allen andern in Hiftoriē für
 gefetzt vnnd für den beften vnd nützlichften gehalten wirdt/ Do mit aber folich Hi-
 ftoria auß dem Latin in teüfch verandert/ an den tagk kommen/ vnnd offenbarth
 wurde/ Jft mein begire lange zeit gewest die felbige ewr koniglich maiestadt(als ey-
 nē obriften haupt vnnd regirer des heiligen Römifchen reichs)zů zůfchreiben/ wye
 dañ hyeuor der gleichen. Valerius Maximus fein hiftorien/ vonn merglichen ge-
 fchichten vnnd ſpruchen/ dem keyfer Tiberio/ vnd Plinius fein werck von der na-
 türlichen Hiftorien Tito Velpafiano zůgefchriben vnnd gefchickt haben/ Solich
 werck allermechtigter konig(das zů vor an ewr koniglichē maiestat zů ccrc/ dar zů
 Furfte vnd heren auch gemeindē vnd ftettē teutzfcher Nacion/ zů nützein teutzfch
 bracht in der loblichen ftadt Mentz gefertigt vnd getrückt ift) wöll Ewr ko. M.gne-
 diglich vffnemē/ In welcher ftadt auch anfenglich die wunderbare kunft der Trü-
 ckerey/ vnd jm erften vonden kunftreichen Johan Güttenbergk/ do man zalt nach
 Chrifti vnfers heren gebürth Taufent vierhunderth vnd fünffzig Jareerfunden/
 vnnd darnach mit vleyß koft vnd arbeit Johan Fauften vnnd Peter Schöffers
 zů Mentz gebelferth/ vñ befendig gemacht ift worden. Darumb die felbe ftat nicht
 allein bey Teützſcher Nacion/ funder auch bey aller welt in ewige zeit(als wol ver-
 dynet)gebreyft vnnd gelobt folle werden/ vnnd die burger vnd eynwoner do felbift
 des billich genieffen.

13^r

I

Ein kurtze vorred der rechten warē
Kömiſchen hystorien.

SO ich oft vnnd vil by mir felbs be-
tracht hab/ was einem weltlichē man aller meinft zů ver-
nunfft dienē/ zů manheit vnd einem tugētreichē lebē brin-
gēmüg/ Find ich nach meinē beduncke nit nützers noch
fruchtbarlichers/ dañ flyffig hiftorien vnd altgefchichten
zů leßen wů die allein ordenlich als ſich des die alten Rö-
mer geflyffen habē/ beſchriben werden wañ von jnen ein
yde gefchicht warlich/ wiefich die an jrfelbs begeben hat/
mit allen vmbftenden worten vnd thattē/ dar an icht ge-
legen gewefen ift/ beſchriben wirt wů das nit beſchicht/
möcht ſyn/ das ſich vff hiftorien zů geben/ kleine frucht gebâr/ Dañ was hilfft mich
oder war zů dienet es mir/ das ich weiß/ das die Römer jr künig vertriben/ vnd ein
ander regiment/ an ſich genomen haben/ fo ich nit weiß/ warumb/ vnnd auß was
vrfachenes beſchehē ift/ oder was nutz enttett mir dar von das ich ließ/ das Scipio
der edel Römer/ die mechtigen ſtat Cartago gewunē vnd erobert hat/ wan ich aber
ein vffmerckē hab/ auß was not das beſchehē ift/ was ſich die Römer vñ Cartago
dar vnder erlitten haben/ was red vñtāding dar zwüfchen gefchehen ſein/ wie wyß
lich mit was vorteil vnnd hoher vernunfft Scipio ſein anſchleg gemacht/ wie man
lich vnnd ritterlich er den nach kommen/ vnd die mit den werken volltreckt/ vnd vol-
endet hat/ das dienet/ einem yeden/ der ſich in ritterlichē oder weltlichen ſachen üben
ſoll vnd müß/ daruß nympt der alt weißheit/ der iungmanheit vnnd gefchiklichkeit/
vnd lernet wie man ſich zů tugenten keren/ ſchand vnd lafter fliehen vnd myden fo
es mag auch ein yeder/ der in der welt ſein wil/ ſein vernunfft/ durch ſollich alt ge-
ſchichtē leyte vnd richten/ vnd dar ab exempel nemē/ wie jm gezym ſein leben zůſchi-
cken in allem dem das jm begegnet vnd zů handēgat/ wie er es zů güttem loblichen
end bringen müg/ vnd das nit allein in kriegē/ vnd in ſtryten/ fonder auch in ret-
then/ vnd in allen burgerlichen ſachen/ die ſich inlanden vnnd ſtetten begeben mü-
gen/ Wer auch bedenckt wie Rom dieſtat einen ringē anfang gehept/ durch wólche
übung vnnd fitten ſo großlich zůgenomē gewachfē/ vnd zů letzt all dife welt beſtrit-
ten jr vndertōnig vnnd gehorfam gemacht hat/ war durch ir gewalt vnnd macht
ſichgemeyndert vnnd wider ab gangē ift/ das dient nit wenig einem yden/ der von
gott dem almechtigen darzů angefehen vnd verordnet ift/ das er land oder ſtett regi-
ren ſol/ Halten wir nicht/ darumb die alten für wyſer/ dañ die iungen das ſie geübt
vil gefehen/ vnd erlept haben/ darauß ſie gegen würtige zůfel deſterbaß ſchicken kun-
den vnnd wiſſen/ Wiewol ſich ir alter/ menſchlichem lebē nach/ nit über achzig oder
vff das lengft/ zů hundert iarē ſtreckē mag/ die zytlang vnfers lebēs/ wir das myn-
der teyl/ vns ſelber vnd andrē menſchen zů nüt3 bringē/ wan die iugēt wirt gemein

lich in torheit vnd yttelkeit üppenlichen verzert/ fo wirt das alter gebrechenlich/ vn̄
mit blódikeit beladen/ vnnd fo ein menſch im ſelber vnd andern am nutzeften wer/ fo
würfft in kranckheit darnider/ oder wirt mit dem tod von hynnen gefcheiden/ wer
aber fleißlich hiftoriē vnd alt gefchichten ließt/ vnd dar durch erfert nit allein was
in eins menſchen lebē/ oder in einer ftatt/ fonder was ſich in allen landen vnd ftetten

ij

13^v

vor zweytfent jaren hermercklichs begeben hat/ der mag (wů er das in sich bilden vnd fassen wil) in kurtzen jaren erlangen vernunfft vnd gefchicklichkeit/ das er sich on zweyfel in allem dem das jm in lynē lebē zůftet/ defter weißlicher vñ fürfichtiglicher halten/ jm selber vñnd andren nutz schaffē Eer vñ lob erlangē mag/ dar vmb sollen wir billich danck fagen den alten/ die follich hiftorien vñnd alt gefchichte mit groffem vleiß iren nachkommē zůgůt vnd inen selber zů ewiger gedechtnuß befchriben haben. ¶ So ich nůn befind/ das in tůtfcher zungen follicher warē vnd recht befchribner hiftoriē groffer mangel ift Hab ich Bernhardus ſchōferlin/ doctor in keyferlichen rechten) mir selber fürgenommē mit hilff des almechtigē gotz (der myn vernunfft vnd zungen/ leyten wůl) dē gemeinē nutz zů gůt/ zů lob vnd eer/ turfcher nation zů befchreiben die rechtē warē Rōmifchen hyftorien/ von vrfprung der ſtat Rom/ wie ſie von erft gebawē wardt wie jr regiment von anbegin durch die kůng darnach durch iarlichen gewalt zweyer Burgermeifter (die ſie Confules genent haben) vnd eins ratz/ ein lange zeit beftandē ſy/ wie auch das Rōmifch volck durch die gemeind oder zunfftmeifter (die ſie Tribunos Plebis genant habē/ den hochftē gewalt an ſich vñ die gemeind bracht hatt/ Vñ wie es am letftē zů der Monarchia das ift zů gewalt vñnd regiment/ eins einigen menſchen kommen ſei/ dardurch die keiferlich wůrde iren vrfprung vnd anfanck genommen hat/ vñnd was zwytragtkeit/ krieg vnd ftreit ſich dar vnder zweyſchen frůnden vnd fynden begeben haben. Jch wurd auch zů ſeinen zyten der tůtfchen manheit/ vñnd tugend nit vergeffen/ ſonder ordenlich befchreibē/ was in vor funffzehnhundert jaren mit dē Rōmern vnd ander nation begegēt ift/ wan ich fiend fouil manheit vnd ritterlichs werben von jnen befchriben das ſie in dem für all nation gelobt ſein/ Jch wil mich aber nit fleiffen noch dar vff geben/ das ich von wort zů wort die altē bůcher der hyftorien zů tůtfch bring/ wan ſy zůnil lang ſein/ vnd menig heidifch gefert vñ abgōttery in ſich halten, ſonnder allein dar auß ziehen vnd nemen/ das ſich mynem beduncken in tůtfcher ſprach am baften fügen wil/ Auch mich nit vff ein bůch begebē / ſunder auß allen bewerten bůchern durch die latinifchen vñ kriechifchen befchriben/ ſamlen/ das mir fůglich ift/ als die biennē thůn/ die auß mengerley blumē das fůß fugē/ douon ſie jr honig zůſamen tragen/ Vnd wil verfůchē ob es in tůtfcher ſprachlichlich zůhōren/ fůßlich luten/ oder icht fruchtbers do von entſpringen wůl/ Jch hoffes ſol zů dē mynften mer nutz bringē dan das man die fabel (die man nennet/ die ritter bůcher) die erdachte vngefchchne/ auch vnglōbliche ding in ſich haltē/ leſe/ die auch den menſchē zů ſolcher vernunfft/ vnd gefchicklichkeit Als diſe warhafftige hiftoriē nit ftůren noch bringen mügen/ vnd bit ein yeden der diß bůch leſen wirdt/ das er myner gebrechenlichkeit verzyhen vñnd ich ſey lebend oder tod myn zů dem beſten wůl auch gedencken.